



LE GOUVERNEMENT
DU GRAND-DUCHÉ DE LUXEMBOURG
Ministère d'État

Le Ministre des Communications
et des Médias

Äntwert vum Här Xavier Bettel, Kommunikatiouns- a Medieminister a Minister fir Digitaliséierung op d'parlamentaresch Fro N° 5644 vum 1. Februar 2022 vun den Hären Deputéierten Roy Reding a Fernand Kartheiser

- 1) Wéi steet den Här Minister zur Iwwerleeung, datt den Asaz vu Cookien op europäeschem Plang misst reglementéiert ginn, fir d'Internet-Benotzer virun der Publicitéitsindustrie ze beschützen?

Déi aktuell Gesetzgebung fir „Cookien“ baséiert op zwee Instrumenter: e spezifesche Kader, d'Direktiv 2002/58/EC, bekannt als „*directive vie privée et communications électroniques*“ (oder „ePrivacy“ op Englesch), wéi ofgeännert, déi an déi lëtzebuergesch Gesetzgebung duerch dat geännert Gesetz vum 30. Mee 2005 iwwer de Schutz vun der Privatsphär am elektronische Kommunikatiounssecteur transposéiert gouf, an dem allgemenge Kader fir de Schutz vu perséinlechen Donnéeën, sprécht dem Reglement (EU) 2016/679, bekannt als „*Règlement général sur la protection des données*“ („RGPD“).

Dës Artikulatioun tëscht deenen zwee Instrumenter mécht et, wéi déi national Dateschutz Kommissioun („CNPD“) eis matdeelt, fir déi betrafte Kontrollautoritéiten schwéier, d'Konformitéit duerchzesetzen. Fir d'Bierger an d'Bedreiwer vu Websäiten an Applicatiounen z'ënnerstëtzen, huet d'CNPD Richtlinnen iwwer Cookien an aner Traceren ¹, souwéi eng Fiche pratique zu dësem Thema², publizéiert.

Ausserdeem, kann ënnerstrach ginn, datt d'ePrivacy-Direktiv heterogeen an de Memberstaaten vun der Europäescher Unioun („EU“) transposéiert gouf. Fir déi technologesch Entwécklungen zënter der leschter Ännerung vun der ePrivacy-Direktiv ze berécksiichtegen, fir d'Harmoniséierung vun dëse Reegele bannent der EU ze verbesseren a fir d'Regelen vum RGPD z'ergänzen, wier et ganz wichteg eng Europäesch Léisung ze fannen. D'Europäesch Kommissioun huet en ePrivacy-Reglement proposéiert. Leider sinn d'Verhandlungë nach net ofgeschloss. Dëst Reglement soll d'Benotze vu Cookien, a méi breet den Technologien déi fir den Tracking an de Profiling fir den Zweck vu personaliséierte Reklamme benotzt ginn, reguléieren.

- 2) Geet den Här Minister dervun aus, datt et iergendwann misst méiglech sinn, d'Publicitéits- a Kontaktverfolgungsstrategie, déi hannert de Cookies stécht, duerch bezuelbar Abonnementer ze ersetzen?

Et ass enger Websäit och am Ament scho méiglech, den Zougang zu sengem Inhalt duerch Abonnementer ze monetiséieren. Laut der CNPD, dierft d'Bezuelung fir den Zougang awer net de Refus fir d'Benotzung vu Cookien ersetzen (bekannt als „cookie walls“) déi fir den fir Tracking / de Profiling benotzt ginn. An

¹ <https://cnpd.public.lu/fr/dossiers-thematiques/cookies.html>

² <https://cnpd.public.lu/fr/actualites/national/2022/01/fiche-pratique-cookies.html>

esou engem Fall kann d'Zoustëmmung vum Benotzer, laut RGPD, net als „fräi“ ugesi ginn. Eng Analyse vun all Eenzelfall ass noutwenneg, fir d'Legalitéit vun esou Systemer ze bewäerten.

D'Benotze vun dëse „cookie walls“ ass ee vun de Punkten, déi an de Verhandlung vum proposéierte ePrivacy-Reglement diskutéiert ginn.

3) Wat hält den Här Minister dervun, Cookië progressiv ganz ofzeschaffen ?

Et muss en Ënnerscheid tëscht zwou Zorte vu Cookië gemaach ginn: „essentiel“ Cookien, ouni déi verschidde Websäite net funktionéiere kënnen (zum Beispill, e Cookie deen onbedéngt fir de Fournisseur néideg ass, fir e Service unzebidden, deen ausdrécklech vum Abonnéierten oder Benotzer gefrot gouf), a Cookien, déi fir Tracking, Profiling oder Reklammezwecker benotzt ginn (zum Beispill, e Cookie dee fir Verhalensiwwerwaachungszwecker op der Terminalausrüstung deposéiert ass, nodeems déi erfuerderlech Informatiounen geliiwert goufen).

Déi éischt sollen „ausschléisslech d'Transmissioun vun enger Kommunikatioun iwver en elektronesch Kommunikatiounsnetzwerk assuréieren“ oder sinn „onbedéngt néideg, fir datt de Provider en Informatiounsgesellschaftsservice, deen ausdrécklech vum Abonnent oder Benotzer gefrot gouf, kann ausféieren“³.

Et sief bemierkt, datt et fir déi zweet Zort vu Cookien lues a lues nei Technologien a Methoden fir déi selwecht Zwecker gëtt. Dës Aspekter ginn och am Kontext vun de Verhandlung vum der ePrivacy-Reglementpropositioun diskutéiert.

Luxembourg, le 7 mars 2022
Le Ministre des Communications et des Médias
(s.) Xavier Bettel

³ Cf. Artikel 4, Paragraph 3, ënner e) vum uewe genannte geännerte Gesetz vum 30. Mee 2005, fräi aus dem Franséischen iwwersat.